



PORTAVÓS VI GOVERN U KONSTITUSIONÁL



KOMUNIKADU BA MEDIA

Díli, Loron 13 fulan-novembru tinan 2015

Forum Juventude CPLP nian termina iha Dili

Forum Juventude Komunitade Nasaun ko'alia Lia-Portugés (CPLP – sigla iha lia-portugés) termina ona horisehik, loron 12 fulan-novembru, iha Loron Nasionál Juventude Timor-Leste nian no komemorasaun masakre semitériu Santa Krús tinan 1991 nian. Forum ne'e, ne'ebé inklui representante sira hosi konsellu juventude sira husi Estadu-membru CPLP nian sira, hahú ona iha loron segunda, 9 fulan-novembru, semana ida ne'ebé nakonu ho eventu. Primeiru-Ministru, Rui Maria de Araújo, fó nia boazvindas ba delegadu sira, iha semináriu ida ho títulu “Joven sira, paradigma foun ida ba transformasaun globál”, ne'ebé realiza tiha ona iha Sentru Konvensaun Dili nian.

Primeiru-Ministru fó aten-barani ba joven sira ne'ebé halibur malu iha ne'ebá atu halo oinsá ema bele rona sira nia lian no atubele proativu iha sira-nia comunidade. “Imi-nia partisipasaun no espíritu empriededor ne'e importante atu mundu bele sai fatin di'ak ida ba moris”. Imi nia interasaun dinámika no imi nia enerjia atu hasoru dezafiu sira sei fó ba imi, foin-sa'e sira, kapasidade atu influensia rumu husi ita-nia país sira (hodi sai hanesan) paradigma foun ida ba transformasaun globál”, afirma xefe ezekutivu.

Konsellu Nasionál Juventude Timor-Leste nian hola iniciativa atu organiza sorumutuk internasionál ne'e, ho apoiu husi Sekretaria Estadu Juventude no Desportu, ho misaun atu “mantein no hametin liután amizade, kooperasaun, solidariedade no diálogo interkultural sira entre foin-sa'e sira lia-portugés nian.

Programa Timor nian balun ba juventude, ne'ebé diskute ona iha semana ne'e, inklui Parlamentu Foin-sa'e nian, ne'ebé kria iha tinan 2009, iniciativa oin-oin kona-ba formasaun iha área agrikultura no meu ambiente, nune'e mós ho kursu kona-ba jestaun projetu sira, empriededorizmu ka kapasidade atu kria empregu no voluntariadu sira ne'ebé oferese hosi Sekretaria Estadu Juventude no Desportu. Kursu sira ne'e apoia cooperativa kiik-oan foin-sa'e sira ninian iha área oin-oin, inklui konstrusaun instalasaun desportiva sira nian no jestaun ba eventu sira comunidade nian.

Iha loron-terça, delegadu sira hala'o sorumutuk iha Assembleia Nasionál atu diskute no haree fila-fali Estatutu sira no aprova Aktu Konstitutivu nian. Durante sorumutuk ne'e, delegadu sira ko'alia kona-ba Agenda Desenvolvimento Pós-2015 nian no asina ona dokumentu ne'e ho konkluzaun sira husi serbisu Forum Juventude CPLP ne'e nian, hanaran Deklarasaun Dili [lia-portugés-Declaração de Díli]. Iha loron-kuarta, delegadu sira hala'o mós vizita kortezia ba Prezidente Repúblika, Primeiru-Ministru, Parlamentu Nasionál, Sekretáriu Estadu Juventude no Desportu, Konsellu Nasionál Juventude Timor-Leste nian no



Agio Pereira

+670 7723 0011

agio.pereira@cdm.gov.tl

govtlmedia@gmail.com

www.timor-leste.gov.tl

Eskola Portugeza Dili nian. Sira hala'o mós vizita ba Arkivu no Muzeu Rezisténsia Timorensa.

Forum Juventude nian ne'e remata ho partisipasaun husi delegadu sira iha Misa ba Loron Nasionál Juventude nian no Marxa husi Igreja Motaél to'o iha Semitériu Santa Krús nian. Iha loron ne'e, halo mós leitura ofisiál no asinatura ba Deklarasaun Dili nian no han kalan fahe malu nian.

Portavós Governu Konstitusionál VI nian, Ministru Estadu Agio Pereira, fó parabéns ba Konsellu Nasionál Juventude Timor-Leste nian no Sekretaria Estadu Juventude no Desportu, ba sira-nia esforsu tomak ne'ebé kontribui ona ba susesu Forum Joventude CPLP nian ne'e. "Hanoin hirak ne'ebé fahe ba malu ona no amizade hirak ne'ebé kria tiha ona iha loron hirak ikus ne'e", nia dehan, "iha influénsia pozitivu ida ba futuru. Timor-Leste no comunidade sira CPLP nian presiza partisipasaun husi ema hotu, foin-sa'e, katuas, mane, feto, husi sira ne'ebé hela iha knua ki'ik sira no husi sira ne'ebé hela iha sidade boot sira, ba ita-nia nasaun nia susesu no dezvoltimentu. Maibé, Timor-Leste, ne'ebé maka 60% husi populasaun ho otas menus husi 25, iha responsabilidade espesial ba foin-sa'e sira, ne'ebé fó ona kontributu ba dezvoltimentu Nasaun nian no mós sira ne'ebé sei mai iha tinan hirak oinmai." **REMATA**

